

¡BOMBA!

Con falda y chips de serpientes
reinará Coatlicue virtual
en América y en mentes
del ciberespacio abisal



k'uintsil

Jueves 27 de noviembre de 2025

CAMPECHE · YUCATÁN · QUINTANA ROO · AÑO 11 · NÚMERO 2615 · www.lajornadamaya.mx

Teatro de la Rendija ku ye'esik balts'am chíimpoltik Felipa Poot Tzuc, maaya ko'olel péeknaj yóok'olal u kaajal



Oochel Facebook Teatro de la Rendija

Felipa, un relámpago en la oscuridad jump'éel balts'am ku chíikbesik u kuxtal maya x-activista téetel xsindicalista Felipa Poot Tzuc (1903-1936). Meyaj tu beetaj ti'al u kaláantik u kuxtal maaya kaajo'ob te'el k'inako'obe' tu péeksaj u yóol Raquel Araujo, máax jo'olbesik balts'am.

"Juntúul k'a'anan ko'olel máax yanchaj ti' u muuk'il péeksik u kaajal Kinchil tu jo'oloj paalitsilta'al tu paalil. Tu ka'ansaj xook yéetel ts'iib ich maaya yéetel

káastelan t'aan. Le beetike', jach ok'om óol u tukulta'al kiinsa'ab tu kaajal ka'alikil 33 u ja'abil, tumen ku máan u péeksilt u páajtalil u yéet kaajalo'ob", tu ya'alaj Araujo.

Meyaje' yáax tukulta'al tu ja'abil 2016, ka'aj jáan chíikpaj Felipa beey juntúul personaje ichil jump'éel balts'am tu beetaj Raquel, tu k'aaba'taj, El siglo de las mujeres. Le meyaj je'elo' tu péeksaj ti'al u beetik jump'éel guión tu múul meyajtaj yéetel xts'iib balts'am Ana Lucía Ramírez, xbeet balts'am Katenka Ángeles yéetel xts'iib

Sasil Sánchez. Úuchik u beeta'al ts'iibe' yanchaj u xak'alta'al jejeláas ba'alo'ob ti' u kuxtal Felipa, ts'o'oke' yanchaj tak tsikbal yéetel u láak'o'ob láayli' kuxa'ane'.

Beey túuno', balts'ame' ku táakbesik xan maaya t'aan, yéetel ts'iibo'ob meyajta'ab tumen Sasil Sánchez yéetel u paaxil Germán Romero. Le jats'uts ba'alo'oba' ku múul yantalo'ob yéetel juumo'ob beeta'ab tumen David Puc, u escenografíal Óscar Urritia yéetel u nook'ilo'ob beeta'ab tumen Elena Martínez Bolio.

Le bix kaláanta'anil bix u chíikbesa'al balts'am yéetel xan u paaxile', ku méek'ik u meyaj Katenka Ángeles, máax ku ye'esik u paalil Felipa, ba'ale' beyxan tak u k'iinilo'ob úuchik u jach péek yóok'olal u kaajal.

Felipa, un relámpago en la oscuridad, yaan u béeytal u ts'ook cha'anta'al desde bejla'a' jueves 27 tak domingo 30 ti' noviembre. Láas 8 áak'ab tu kúuchil Teatro de La Rendija sede A, tu bejil 50 #464-D ichil 49 yéetel 51, K'iiwik. Balts'ame' 50 minutos ku xáantal.